

石中英先生

錄音段落：07

時間長度：64 分 39 秒

Accession No. YP024

時間	受訪者 / 訪談員	內 容
00:00	訪談員：	年年都介紹幾個嘅。
00:02	受訪者：	係呀，年年都介紹幾個㗎，我諗我前前後後呢，去介紹新晚...大公...報館嘅人呢，即係超過...係十幾廿個㗎，所以我有一班新聞界嘅好朋友呢，其實佢係...(笑)係我介紹佢去嗰度做嘢嘅，同埋睇住佢入，所以我變咗同《文匯》，除咗同《大公》之外呢，我《文匯報》嘅關係好深嘅，即係...咁嘅情況之下我介紹咗畀佢，咁...先先講番寫嘢先，用石中英，點解石中英呢個名係點走出嚟嘅呢？就係...唔係寫托派先，而係呢，首先就係...寫散文，咁散文點搞出嚟呢，就要多謝個《文匯報》嘅副刊編輯，個名呢叫做王永峰，咁當時佢個拍檔呢，就係大家熟悉嘅羅孚個太太，吳秀貞，(笑)所以呢個世界好細㗎咋，咁我上去嗰度呢，即係大概...73 年度啦，即係我停咗《新晚報》，即係鬼佬話齋，一個 window close 咗，一個 door open，就係 exactly 係咁樣樣，即係我門埋咗個編輯呢度門呢，突然間度門打開咗呢，就叫你寫嘢嘅，咁佢就話不如咁啦，你喺《新晚報》咁多年，不如你寫啲嘢，咁我有個欄呢，就叫〈水珠集〉喺副刊度，就散文，咁散文點樣樣呢？你唔好超過千五字，千二字、八百字都得㗎㗎，你就寫散文，咁我話有...我教書，教緊 Maths，我邊有咁多時間...即係...日日寫，佢話唔使，你不定期就得㗎，你日日寫都得，一個禮拜一篇又得，兩個月一篇都得，咁於是就開始我個...用石中英個筆名呢，喺〈水珠集〉度發表散文。
02:00	訪談員：	但係點解改呢個名呢？
02:02	受訪者：	呢個名嘅故仔呢，就其實我都已經唔記得咗係點樣改

嚟嘞，因為最初呢，我係...我石呢，我好鍾意石，stone，咁呢個嘢呢，係來源於...一個我係好尊重嘅作家魯迅，因為魯迅係一句話，叫做「石在，逗點，火種是不會絕的，full stop。」咁呢句嘢令我一個好大嘅奇妙，呢個奇妙嘅嘢呢，我問過好多朋友，佢都諗唔到個奇妙性就係...點解石同火有關係呢？(笑)即係一個咁冰冷嘅石頭，同個咁熱嘅火，吓，即係個五行之說，喺文學入便顯示嚟講，咁我事實上我就覺得我哋係個...即係要...呢個世界嘅黑暗呢，當時青年人嘅想像，呢個世界就係需要有光明，光明就係火，有石呢啲咁平凡嘅嘢呢，就可以變成一個火出嚟，石嘅撞擊呀，吓，等等，咁所以就係定咗首先係姓石先，咁最初本來呢，我好早期呢，喺《新晚報》做編輯啲啲...啲啲攝期嘅呢，啲啲有少少用過幾次呢，啲啲寫啲啲嘢呢，就用石華嘅，華即係個個精華咁解，就唔係中華，咁呢石...兩個字好似唔係幾好，唔夠響，不如石...三個字吖，石裏便嘅精華，咁有理由石中華嚟啦，石中英啦，吓，英就係...即係好嘢，吓，唔係英雄嘅，可能有少少英雄，但係主要唔係啲樣，係好嘢，精英，石中英，呢個問題呢，阿陶傑問我，佢話你個名係咪因為中英關係呀？(笑)我話絕對有諗過中英關係，我話潛意識有冇呢，就好難講，即係潛意識我喺以前啲幾次同你個訪問都講，中英關係令我個身分矛盾係掙扎咗...特別我個六十年代呢，係好大呢個...疑問，到後期我 take 咗 side，係先至解決呢個問題嘅啫，咁有冇呢個潛意識，可能有，但主要就係因為呢個石...同埋個裏便個英，就係咁樣出嚟，咁就開始用呢個筆名愛嚟寫，咁喺呢條線裏便呢，又...就將我，用石中英呢個筆名呢，由 73 年開始喺《文匯報》嘅副刊〈水珠集〉發表文章，我都唔知發表咗幾多篇，一路寫寫到大概 77 年度係冇寫，都唔係好多，大概百零二百篇度啦，大概我唔記得咗嘞已經。

04:54 訪談員： 都係散文為主。

04:56 受訪者： 散文，全部散文，咁裏便呢，其實呢，特別早期呢，由 73 到 75，咁我 75 年呢，已經係...就結集成書，就將佢其中四呀二篇文章，就結集成一本散文集叫《我

愛秋風勁》，就出被嚟嘞，咁呀又係王永峰幫手，佢話呢，哎，你不如...青年出版社同你出啦，咁樣，三蚊本咋(笑)，喺，咁呢就全部嚟《文匯報》副刊就發表過嘅，咁呀寫啲咩嘢呢？咁呀實際上呢，就好似我六十週歲，我印咗個...精裝本嘅入便講嘅一樣，呢啲係我嚟...廿三到廿五歲寫嘅文章，但係全部 reflect 番呢，嚟十五歲到廿五歲嘅生活，咁裏便呢，係有我讀書嘅時候...派《青年樂園》嘅報童啦，裏便有一篇文章，咁呀亦都反映六七...赤柱入便呢，有兩篇文章啦，一篇叫做〈斷手〉就係講中華中學嘅一個學生畀炸彈炸傷手，然後畀一啲錯誤嘅醫療，整到尖咗嘅骨頭...嘅故仔啦，咁另外一個就係有少少改動，將個日子由國慶節改做五一節，但係裏便係完全一樣內容，叫做那一樣...〈那一夜我們歌唱〉，係講我哋唱國際歌嘅情況，係成個書嘅壓軸篇，咁但係當時仲係英國人嘅環境入便係用好隱晦嘅嘢嚟講，一啲咁嘅嘢，咁個篇嘢我睇番嚟有啲散文都係...令自己汗顏呀，因為係...都係好...比較偏激，即係...但係青年人，邊有唔偏激呢？係咪？即係變...reflect 咗個青年人嘅一種求真或者係一種...好綠嘅，green，即係好青蔥嘅一個咁嘅嘢，咁就係好多謝《文匯報》，咁所以我係嚟個階段上就係...75 年我出咗第一本嘅散文集，咁現在仲擺喺中央圖書館，但係中央圖書館擺個唔係呢本，中央圖書館擺呀 85 年本，呢個另一個故仔，反而 75 年本呢，我都係最感...即係最感動就係今年嘅 7 月份同小思老師正式...其實我哋識嚟嘞，但係第一次用咁嘅身分我哋大家...當係《青年樂園》舊陣時嘅大家作者...嘅身分見面嘅時候呢，佢拎個本舊版，即係唔係你嚟中大圖書館見個本，係嚟...佢係自己藏有一本舊到黃晒頁嘅個本書，叫我寫名嘅。

07:56 訪談員： 我嚟中大有見過呢本書，er...港大圖書館有。

08:00 受訪者： 冇見過，ok，唉呀，我唔知港大圖書館有，多謝你畀個 information 我，咁其實我唔係...我係好自豪呢件事，但係我唔...到現在我都唔認為係識寫嘢嘅人，我只係 reflect...

08:13 訪談員： 如果我有記錯呢，港大圖書館呢係有 1975 年，亦都有 1985 年，如果我有記錯吓吓，可能我記錯呀，我記得好似係有兩本嘅。

08:22 受訪者： 哦，多謝你嘅資料，有機會...有機會我返去睇下，我只不過呢...即係我覺得係...呢個年代，呢個時代呢，一部份青年嘅思想感情擺落去，咁係值得係保存，或者係覺得...我係唔係代表佢哋，我係佢哋其中一個，就係咁樣樣，咁呢個就係我開始咗個石中英嘅生涯同埋散文嘅生涯。

08:48 訪談員： 但係...至於批托嗰樣嘢呢？

08:50 受訪者： 喺，批托嗰樣嘢呢就值得講一講嘞，咁呢個事幹呢就係咁樣樣嘅，點解無端端石中英成為香港批托第一人呢？真係有個故仔嘞，咁呢個故仔其實好奇怪嘅，就係呢，即係我 er...《新晚報》做啦，同埋我做我嘅數學教師，小編輯、數學教師，約莫係...因為你係經歷咗個六七事件嘅...嘅洗禮呀，咁你對社會嘅...即係香港社會嘅運動，即係或者...活動，你係一個天生嘅關注，同埋你好想參與，但係你嘅參與...我嘅參與已經係比...我話畀你聽，我係唔會好似六七咁嘅，我唔會投入，我係保持一個距離，一個 **distance** 我會觀察，但係我會 **present**，我會觀察，但係我唔參加，咁所以呢，基本上，基本上，六七之後嘅社會活動呢，我...所有佢嘅活動我都會去睇，包括保衛釣魚台事件啦，吓，當時我記得《盤古雜誌》搞呢個辯論呀，咁保衛釣魚台事件呀，我會參加，作為一個好沉默嘅觀眾，聽，所以收扪我同阿馮廣強講，當時我係聽你啲嘢嘅，即係收扪我哋變成好好嘅朋友，一件事，吓，咁...好似...七七維園，保釣，我係坐得嚟好後，我唔會坐前，係睇住阿岑建勳嗰啲畀人拉，即係佢係好積極...即係...我...到底係發生咩事呢？我係有個心嚟度，但係好似仲有少少 **distance**，我亦都唔想...保持距離，我全部都去，包括咩中文運動呀，你講得出嘅，捉葛柏呀，所有嘅集會，如果我唔係坐嚟度我就嚟出便睇㗎嘞，我基本上全部全程我係關注晒所有嘅嘢，咁直到有一次呢，我就見到...當時呢，第一個問題出嚟呢，就係 1970

年，係出咗兩本嘅刊物，一本叫做七一...《七〇年代》，七零呀，一個叫做《七十年代》，用中文寫嘅七十年代呀，咁呢兩本嘢呢，就係一個...劃時代嘅界限。

11:20 訪談員： 哦，一個叫做《七〇年代》。

11:22 受訪者： 七〇即是呢...其實我講少少呢，七〇呢，即係...七零呀，《七〇年代》，一個呢叫做《七十年代》，係兩本書呀，係兩本雜誌係完全唔同嘅，咁呢個《七十年代》呢，當時呢我係以...即係有少少《老左正傳》嘅傾向呢...嘅人呢，就當然覺得《七十年代》用中文寫呢個呢，係比較啱口味。

11:48 訪談員： 即係李怡主編個。

11:50 受訪者： 就李怡主編嘅，咁當時呢，李怡用齊辛個筆名發表文章，我哋奉為...差唔多好似香港《紅旗》雜誌嘅...社論咁嘅，當時佢係...即係唔係家下個評論，唔係家下蘋果個評論，而係當時...亦都唔係刷大陸鞋，但係當時佢係講到...美國佬呀、英國佬呀，吓，殖民主義呀、帝國主義呀，er...中國嘅文化大革命呀，乜乜物物呀，等等，ok，呢個叫《七十年代》，咁另一個呢，呢個係用一個呢啲...呢啲咁嘅紙呀，叫做咩呀？A Four 紙，A Four 紙呢，一個咁樣嘅面呢就揭嘅，吓話，咁呢個就係一個我每月必讀嘅...雜誌，因為我當時仲喺《新晚報》，做緊編輯，咁當然更加要注意呢啲思潮啦，咁我仲有協助編〈風華版〉㗎嘛，咁呢啲冇理由唔睇㗎，好嘞，咁但係有一本嘢呢，同時呀，係 1970 年出版嘅，吓，都係 1970 年，兩本都係 1970 年出版嘅，呢個呢，都係嗰年嘅，一個大時代，就《七〇年代》，呢個《七〇年代》就係一個好活潑嘅思潮嘞，裏便名人輩出，包括莫超如啦，著名嘅無政府主義者，包括岑建勳啦，吓，等等人，即係我讀唔到咁多人名嘞，好嘞，咁跟住呢就聽講有班人呢，就接觸到...就托洛斯基主義，即係...吓，佢哋呢班人呢，就會好多呢，就去法國嘅，法國去...留學嘅，佢覺得當時嘅革命思想呢，係法國，吓，呢班人呢，1967 年係一個分水線，1967 呢，所謂呢班咁嘅左仔、愛國、毛派，咁老實講隨着呢個菠蘿

潮嘅結束，即係英國人慢慢修正佢嘅路線之後呢，就已經係...畀一啲青年人唔係唾棄都有個距離嘞，因為你係比較係...正宗馬列毛，咁你一班人要標榜...係要所謂...慢慢分裂成呢，譬如大學生裏便，未到呢個年紀，慢慢開始國粹派、社會派，可能有啲叫新左派，好嘞...等等，佢係左派，但係佢係新左派，咁呢啲慢慢呢，佢就要探討一個新嘅思潮，咁佢覺得呢，就好似其實好簡單，好似中共最初周恩來、鄧小平都去法國吸收革命思想，咁呢班人呢全部...好多人呢...相當部份，除咗外國返嚟之外，美國呀、澳洲，咩嘢之外，有部份人直程自己走去法國，係吸收種種嘅思想，咁吸收思想之後呢，咁你發現裏便嘅內容嚟講，性，係一個題目嚟嘅，佢裏便，即係佢唔係傳統嘅呢啲左派咁咩，吓，或者藝術係崇尚所謂達達主義呀，印象主義呀，呢啲等等嘅嘢，ok，咁嚟思潮上便呢，佢可以介紹...呢個...佛洛伊德學說啦，沙特嘅超人嘅思想啦，吓，即係譬如上帝已死呀等等，好嘞，亦都介紹無政府主義嘅思想啦，吓，托洛斯基主義係後期啲嚟嘞，有咁快，ok，咁佢係呢，呢個思潮裏便嘅出現嚟講呢，慢慢，有啲活動呢，到 72...71、72、73，開始有啲活動嘞，即係我見到，特別我最印象深刻就係，我唔記得 73 定 74 啦，嚟反通脹一啲運動呢，唔係傳統左派搞反通脹嘅運動，都有，傳統左派有做，反通脹啦吓嘛，即係你知石油風暴，73，通貨膨脹，之後呢，咁呀好奇怪見到，點解有班人，搞...示威，拎住紅旗同黑旗㗎，嚟，一般呢，傳統左派先至係...應該紅旗㗎，但係左派唔拎紅旗㗎，有㗎，啲工會有拎紅旗示威，咁點解呢啲又拎枝紅旗，拎枝黑旗呢？咁跟住派啲傳單，唔係淨係鬧殖民地㗎，唔係淨係鬧殖民政府，仲鬧埋呢，工會工聯...工會官僚，即係現有工會呀，不論左派、右派，都鬧埋，佢係官僚，咁呀激起我一個諗法，到底發生乜家科啦？即係點解有啲咁嘅嘢呢？咁樣，咁呀於是開始睇書啦，咁呀到底係咩嘢呢？咦，咁呀睇到啲嘢返嚟，話原來黑旗啲啲呢，就係無政府主義嘅旗幟，即係佢係有祖國、有國家、有革命，乜都有，係應該係無政府，呢啲就係我哋...其實都係值得尊重嘅，即係莫超如，信奉到今時今日嘅一種學說，即係莫超如而家係個...唔知邊間學校嘅講師我唔記得

咗嘞，佢搞咗啲戲劇呀乜嘢，佢係由頭到尾，由《七〇年代》創辦人到目前在生，仍然係信奉一種嘢，有冇修正我唔知啦，但係佢係香港係好初期將無政府主義，引入香港嘅...頭啲幾個人啦，可以咁講，ok，好嘞，咁另外呢，點解無厘頭（沒關係）有個紅旗呢？咁樣，一般都係共產黨㗎之嘛，一般係馬恩列斯毛呀，好嘞一睇，原來佢有啲嘢係引用到托洛斯基咩嘢，學說，咁於是呢，就開始我要拎番晒呢，即係睇番托洛斯基，買番托洛斯基啲書嚟睇呀，睇番呢個...聯共黨史呀，列寧裏便關於托洛斯基呀，啲啲嘢，咁然後先至發覺呢，香港原來不知不覺之間原來有種叫...不但係馬克思主義嘅...思潮，仲有馬克思主義嘅派別，咁然後慢慢再摸清楚原來馬克思主義嘅派別來源於呢...仲有一個政黨，就叫做第四國際呀，第四國際個總部就係正正係喺巴黎，咁日後研究到第四國際原來係從第三國際分裂出嚟嘅，第三國際就列寧、史太林創立嘅，就覺得係世界...全世界革命嘅一個組織，就全世界就成立一個蘇維埃，就成立一個...吓，世界共產大同嘞，吓，咁中國呢，當時你知...中共呢，1921年成立都有第三國際嘅代表，派代表嚟參加，馬林呀，有兩個代表參加中共嘅建立，咁第四國際呢就即係...即係史...托洛斯基同史太林分裂咗之後逃出...即係放逐離開呢個俄羅斯之後呢，蘇聯啲陣時叫做，喺巴黎創立第四國際嘅，咁越搞越多嘢，好嘞，發覺咁鬼多嘢，但係香港有人講過，有人知過，工會...即係學生工會，喂，呢啲咩人又唔知，咁好嘞，可能即係...可能已經做過咗幾年個...編輯啦，亦都...即係我天生係比較鍾意做一啲冇人做嘅嘢啦，即係好似我喺官校係第一個畀人捉一樣啫，咁都始終要有人做呢件事㗎啦係咪？吓，咁於是就膽粗粗寫咗篇嘢，就準備喺〈風華〉發表，吓，即係...我唔記得咗第一篇係咩嘞，唔知托派舉的是甚麼旗，或者托派咩通貨膨脹表演呀，咁嘅嘢，咁就開始，咁寫咗之後呢，(停頓)冇任何人叫我寫。

20:25 訪談員： 係自己寫。

20:26 受訪者： 噯（是），冇任何人叫我寫，冇人又暗示我寫，係自己傻更更教緊書呢，係因為星期日晚〈風華版〉發表我

諗住，咁多數都係...星期一呢就諗定嘞，就星期二、三、四寫個大綱，星期五晚呢，慘嘞，就星期六唔使返學呢，嗰日呢咁就做通宵，吓，因為星期六交稿呀要，星期日要印，嗰陣時好耐嘅，咁呀寫咗之後呢，第一個搵我嘅人呢就羅孚，(笑)我話羅老總，發唔發表得㗎？

21:00 訪談員： 你擺上去畀佢睇。

21:02 受訪者： 嘎（是），我擺上去畀佢睇，因為佢總編輯咁嘛，咁我雖然離開《新晚報》，但係你知我係六年喺嗰度同佢嘅關係非常友好，咁呀所以我留番條尾巴，咁呀 73、74 呀上去，73 唔知 74 呀第一篇文章，即係做咗教師冇幾耐，就寫篇咁嘅嘢，得唔得呀？羅孚...望下我，照出咗咁樣，我話得唔得呀？佢話唔怕嘞，反正我哋〈風華版〉思想自由，你有乜呀有乜啦，吓話，我話我唔知□唔□喎，我唔係專家㗎，我又未識，有人話過我聽點樣樣㗎喎，係咪先？咁我就將個波擺咗畀佢嘞，即係你話佢要 **consult** 咩新華社咩呀，係佢嘅事唔關我事嘞，即係我呀總之...即係可以...即係壯嚴宣佈，係完全有任何一個人叫我做嘅呢件事，係自己擺嚟搞嘅啫，係咪？但係擺嚟搞就收畀就好長手尾跟，所以我呢...石中英個名係同我係掛唔到任何關係，我係唔會畀人曝露嘅，因為你都見到喺街啲人係點批判我㗎嘞，吓，即係好嘞，咁所以就第一篇。

22:09 訪談員： 第一篇個題目係咩嘢呀？

22:12 受訪者： 我真係唔記得咗係...〈托派份子舉的是甚麼旗？〉，定係唔知係咩...〈通貨膨脹表演〉，即係總之係呢兩個禮拜，係咁樣即係第一篇、第二篇，咁樣出嘅，因為佢淨係喺社會裏便嗰啲咩打倒紅旗呀、黑旗呀，咁樣，同埋點解反通貨，即係我要其實就...其實冇嘢，所謂批判就係將佢點樣 **distinguish**，同埋傳統左派嘅分別，即係所謂呢啲托洛斯基主義同傳統左派嘅分別，就唔係傳統左派，即係同呢個所謂毛派，或者馬恩列斯，正統派，有咩分別嘅啫，就我係想咁樣。

22:48 訪談員： 即係分別佢出去。

22:50 受訪者： 分別咗出去，吓(笑)，呢件事呢，就收厝呢，就係令我係非常 **surprised** 一樣嘢就係呢，我八十年代入咗華南旅行社，即係工聯會下便旅行社之後呢，嗰陣時先至比較多接觸阿鄭耀棠，當時佢係...仲未係工聯會嘅理事長，咁佢...佢話畀我聽佢七十年代喺洋務工會係做事嘅，佢話你知唔知呀，當時你出啲文章呢，我係...星期日晚一出，知道你一出呢，即刻買咁大疊上嚟派畀工友學習，(笑)我話你唔係咁誇張吓嘛？即係我完全冇諗到係有啲咁樣嘅後果，係冇，完全冇諗到，咁又寫第一篇呢，我又冇諗到會寫到幾多篇嘅，咁結果呢，我發覺呢，呢個故事嚟講係延續咗 73、74、75、76...應該 74 開始，74、75、76、77，係四年裏便呢，大概十零篇度啦，係每篇嘅大概係...五千字，由三千到五千字不等，就無厘頭(沒關係)地成為一個批托專家，咁呢個批托專家嘅代價係非常高，非常高呢我原來我唔知道我得罪嘅係咩人，即係...啲人可能以為呢，後便係大陸呀，或者新華社喺後便策劃，但係新華社喺後便策劃就唔使咁孤伶伶一條傻佬(笑)，喺〈風華版〉嗰度出啦係咪先？

24:21 訪談員： 哦，啲人以為你...以為石中英嘅後邊，就有新華社喺度策劃。

24:25 受訪者： 可能有人咁樣估計，(停頓)但係實際上唔係吓嘛，我連...我連佢職工都唔係吓嘛，我連...連《新晚報》職工都唔係，嗰陣時已經唔係嘞，咁我只係一個 **teacher** 嚟㗎之嘛，仲要教 **Maths**，你有辦法...發夢都諗唔到一個 **Maths** 佬係寫啲咁嘅嘢㗎嘛，咁呀好嘞，咁嘅情況之下就出現一個叫做大圍攻局面，原來嗰陣時先知道大鑊嘞，原來你得罪咗啲呢，係好巴閉嘅人，點巴閉呢？原來呢，係有兩個...托洛斯基主義呢，當時七十年代呢，喺香港，係兩組人喺度㗎，一組人呢，叫老托，老托呢個負責人當時姓彭，佢直程係中國共產黨創辦初期(笑)已經有嘅...中共黨員，分裂咗出去，噏，即係俄共，分裂咗出去嘅，成為第四國際嘅成員，中共都有人分裂出去成為第四國際㗎嘛，**ok**，有個姓彭嘅老

先生，我未見過嘅，我只係睇書，我睇佢哋啲嘢，知道呢，我得罪咗第一班人呢，就原來第四國際巴黎總部，一個咁嘅政黨，呢個政黨係一個咩政黨呢？佢表面上呢，係一個被逼害，畀俄共...或者畀呢個逼害，即係佢畀呢個...蘇聯逼害啦，咁亦...但係呢，佢個首領呢，即係托洛斯基主義...托洛斯基呢，亦都係畀蘇聯派人 **KGB** 暗殺啦，喺墨西哥被殺㗎啦，喺四十年代嘅事啦，咁佢係呢個第四國際佢做得啲唔係算好光彩嘅事，因為當時佢就係敵人嘅敵人就係我哋嘅盟友啲類嘢，咁所以佢係喺蘇聯嘅衛國戰爭當中，係站喺...希特拉嗰邊(笑)，即係呢樣嘢就好大鑊㗎，你明唔明呀？即係佢就敵人的敵人就是我們的盟友咁樣，咁你咪大鑊囉，咁所以喺所有嘅嘢嗰度就係一個天然反對派咁樣，總言之你反對乜，反對嘅人我一定同佢結盟。

26:35 訪談員： 即係總言之係我嘅敵人嘅敵人...

26:37 受訪者： 係嘞，咁呢班人已經係被視為呢，好異類㗎嘞，即係好視為異類，總之凡事蘇聯贊成的就反對，啲類，吓話，佢可以...今時係聯德國，明日可以聯美國，即係佢做一啲咁嘅嘢，咁佢係佢有錢，有經費，係一個政黨，咁呢班人喺香港係做一件事呢，就係出版一本雜誌叫做《十月評論》，咁呢班呢叫做老托，我哋簡稱叫老托，《十月評論》雜誌，咁《十月評論》雜誌呢，係一個每月嘅刊物，咁點解用十月呢？由於十月呢個字呢，來源於就係...喺呢個...即係無產階級革命，所謂蘇聯嘅革命入便嚟講，十月革命，咁呀托洛斯基同阿列寧係並肩戰鬥，咁所以佢都係用番十月，十月一個革命嘅，咁事實上十月呢樣嘢嚟講，老實講，即係現在嚟睇，係咪完住係馬克思主義嘅產物都唔係，係列寧主義啫，因為佢係要一個國家，係無產階級專政，專政，一個國家機器，吓，一個政黨，呢個同馬克思主義啲種...即係共產主義同盟，吓，即係咁多個國家嘅革命，達至咩，已經唔係一回咁嘅事，係列寧，所以佢係暴力嘅，嚟，所以《十月評論》呢，佢就係托洛斯基主義，第一，佢係暴力嘅，係暴力推翻革命，同埋佢係不斷革命論，不斷革命論就即係話要全世界都要統一，實際上同阿爺後期嘅 **er...**文化大革命可能仲

有少少相似，即係佢不斷要...推翻、推翻、推翻、推翻，就...不斷推翻總之，吓(笑)，咁呀原來我寫呢啲嘢原來得罪嗰班咁嘅人，咁我唔敢嘅，都係匿埋一、二角用筆去寫啫。

28:34 訪談員： 你話有兩批人㗎嘛，第二批呢？

28:37 受訪者： 呀，第二批人呢，就係香港土生嘅托派，咁呢班人呢實際上...涉及嘅人就好多，有啲已經 in in out out 你已經好難查㗎嘞，噏，好似岑建勳、梁耀忠、吳仲賢、劉青山(註：應為劉山青)，等等人物，喺七十年代呢，呢班好早嘅期間呢，係去嗰度，但係佢同啲老托...噏，老托係中共分裂出嚟嘅，你明唔明個分別呀？即係老托就直程係第三國際時代，中共嘅黨員分裂出嚟搞嘅，喺巴黎總部嘅嘢，所以呢班老托係第四國際嘅一個政黨嘅，咁呢班人整咗之後，你 in in out out 呢，其實你托派，喺香港嘅托派呢，八十...七十年代呢，你如果再訪問啲人，個個都覺得係有關係影響，唔單止係...長毛，包括埋施永青，包括好多人，係受過影響，因為點解呢？佢哋係既...唔能...即係已經對殖民主義呀、帝國主義已經係...反抗，佢亦都唔能...佢覺得馬克思主義係好嘢，但係呢，佢亦都唔認同毛澤東嘅學說，吓，特別文革呀，呢啲咁嘅...大躍進呀，等等咁嘅嘢，佢搵個政...佢覺得呢，能夠反對史太林主義嘅呢，托洛斯基主義呢，係好嘢㗎嘅，咁就呢班人呢，就慢慢組織一個團體叫革馬盟㗎。

30:16 訪談員： 革命馬克思聯盟。

30:18 受訪者： 革命馬克思主義者同盟，咁呢個同盟㗎講呢，當時嘅珠海書院嘅學生，吳仲賢就成為一個領袖，咁當時佢都係...吳仲賢其實係《七〇年代》一個好活躍嘅份子㗎嘅，咁岑建勳嗰啲，梁榮忠呀其實呢，佢係有冇參加到呢啲黨派㗎講我係不得追究。

30:41 訪談員： 即係梁耀忠。

30:43 受訪者： 梁耀忠，但係佢哋呢，受過思想肯定嘅，佢哋係承認

嘅。

30:49 訪談員： 即係受過嗰種思想影響。

30:51 受訪者： 係嘞，托派主義思想，同埋佢哋去法國係接觸過呢班人，返嚟同革馬盟亦都一定...保持住一個關係，佢唔一定係入黨，因為革馬盟已經係一種黨派嚟㗎嘞，咁根據長毛畀我嘅...近日畀我嘅回憶呢，我就問佢，當時呢佢跟咗我哋一啲...即係佢上我《新晚報》呢，係煮飯、去玩嘅啫，煮飯仔畀佢食，玩嘅啫，我未曾親自帶佢睇過一本毛澤東嘅書嘅，咁佢係呢佢嘅回憶錄呢，佢嘅回憶講畀我聽就係呢，(笑)好好笑，就係原來一代一代係唔會停嘅，佢亦都參加咗呢，即係六十年代後期、七十年代初期呢，即係好似我哋嗰啲一啲讀書會呀嗰啲嘢，佢係再唔係咩跑馬地，再唔係嗰啲鋼鐵煉成的，而係赤裸裸地要睇...(笑)《毛主席語錄》，即係有啲金文泰嘅學生，師姐等人呢，係呢啲，甚至呢，係佢講畀我聽係 71 年呢嘅...佢仲問我記唔記得，71 年呢，嘅某一月，巴黎公社一百週年，仲要組織咗班人呢，去到太古水塘嗰度紀念，巴黎公社一百週年，我話大佬，我仲邊度有記得呢啲嘢，我都有去到啦係咪？佢話唔係㗎，我哋嗰陣時成班人，邊個安排去，肯定唔係我都得嘞，吓話，佢係我...咁有心思嘅，走去巴黎公社咩，一百週年，仲喺水塘嗰度紀念，咁佢就話...咁我就問一個問題，咁你幾時接觸托派呀？(停頓)佢嘅答案就係大概 71 年，咁即係當時七十年代...71 年呢，已經...佢應該仲讀緊書呀，就已經開始接觸托洛斯基主義，佢係佢就變咗好 junior，即係佢唔係...唔同呢班頭先講嗰啲人，senior 好多，即係阿...吳仲賢嗰啲，佢係好...即係毛派 transfer 去托派裏便呢，一個咁嘅過程，所以我記得呢，同阿長毛大概...一個開始寫批托文章之後，係撞過佢一次，係我...即係八、九十年代我都未見過佢，係七十年代最後一次見佢呢，大概...唔記得咗時間，74 呀咩呢，喺大會堂低座，圖書館。

33:23 訪談員： 係特登約出嚟見定係撞到嘅？

33:26 受訪者： 冇，撞，完全偶遇，咁我喺圖書館我又唔知搵咩書，大會堂低座圖書館，咁佢呢，一睇睇住佢，睇緊托洛斯基啲書㗎，嗰陣時已經離開學校，唔知做咩嘢，咁於是我話喂，出嚟傾偈，佢仲記得今時今日，我哋兩個喺大會堂低座個天台花園嗰度，陽光下，激辯兩小時，我有用我石中英嘅身分同佢講。

33:58 訪談員： 所以佢唔知道你係石中英。

34:00 受訪者： 唔知道，我只係用一個大師兄嘅身分講，佢亦都知道我...一個 YP (Young Prisoner) 仔，亦都知道我係...所謂毛派當時，激辯，托洛斯基主義，佢仲記得...(停頓) 我講到最後我有辦法講服佢，咁長毛就...當時你知唔知佢最後講句咩㗎？我話唔記得咗嘞，佢好好記性，我有記性，佢話你...總之得得得，唔好做啲對唔住國家人民嘅嘢啦(笑)，我話我到現在都有做到呢件事呀，真係好笑呀呢啲，大家...啲經典對白嚟嘅呢啲係，(笑) 我唔記得咗，ok，咁...

34:41 訪談員： 咁就長毛係咪...據你嗰陣時嘅印象呢，佢就係信奉...信奉托洛斯基主義嘅。

34:47 受訪者： 信奉，但係佢有冇參加革馬盟呢，等等，我唔知，我只係後期睇到一篇施永青嘅文章，施永青嘅文章，喺長毛七...大概 er...即係董建華時代，選咗立法會之後，唔知零幾年，02、03、04 唔知邊年，就...施永青居然發表文章，喺報紙呀，《蘋果》定邊度，(停頓)〈長毛入選議會以後〉佢已經講明呢篇嘢係模仿人㗎〈娜拉出走以後〉篇文章嚟寫，咁就寫佢同阿長毛嘅恩怨情仇，一齊信奉馬...托洛斯基主義，跟住佢自己做地產，佢就做呢啲咁嘅抗爭，點點點，咁長毛入咗議會，點解入議會㗎，冇理由入議會㗎嘛，你...不斷革命㗎嘛，托洛斯基主義點解入議會咁樣，咁(笑)件事呢，到我又同阿長毛約個食飯呀，長毛，點解施永青捉住你唔放㗎？唏，嗰條友仔唔知做乜鬼！我話唔係㗎，施永青嗰陣時贊助你好多㗎，你咩，佢話係，但係...跟住數一輪，施永青冇理由呀，我叫佢...應承我唔做發展商，佢又做發展商，咩都講一輪嘞，我話㗎，唔好講，唔

好講，呢啲嘢唔好講，吓，總言之呢，就大家都係嗰陣時...即係其實一個時裝，一個 fashion 嚟嘅，信奉托洛斯基主義當時係一種思潮，咁但係呢，我起嘅作用呢，就係唔知點解，一個就將佢 distinguish，分開啦，另一個就係...客觀上好似搞到佢有少少臭臭地(笑)，所以呢，我記得當時呢，我逢禮拜日出完呢個...即係星期日呢就好開心，如果有篇大篇長文章，雖然你睇覺得...內容空洞呀，潑婦罵街呀，你覺得咩都有㗎嘞，咁但係一出好開心㗎，有冇人睇呢咁樣，咁跟住過幾日呢，就係...嘩！嗰個街咁多招紙海報，《十月評論》，啲招紙海報，佢又有人...啖交最好，吓！石中英乜乜物物，寫到咁鬼大個，嗰個直程...咁大㗎。

37:05 訪談員： 貼喺邊度呀？貼喺街度呀？

37:08 受訪者： 成個...成街，成街貼，即係係《十月評論》嗰啲 poster 嚟嘅，成街咁樣貼。

37:12 訪談員： 成街咁樣貼，係喺港島...

37:15 受訪者： 香港島，灣仔呀，你...好多地方都有，所以...我就知道我唔能夠蒲頭嘞，噏，即係...(笑)即係我只係知道我得罪咗個國際背景嘅...一夥人，仲咁大嘅字呢就...即係佢謾罵啦，用番謾罵，石中英點樣...我都有晒啲啲書，乸鬼晒，即係謾罵呀，乜乜物物呀，點樣評呀，中共喉舌呀，總之乜嘢呀咁樣，即係我自己都知我唔係，咁但係呢，收畀點解又會咩嘢 er...洋務工會鄭耀棠拎嚟學習，我真係又唔知。

37:51 訪談員： 佢哋覺得 er...點解要拎嚟學習呢？佢有冇講畀你聽呢？

37:56 受訪者： 噏佢覺得呢，第一呢，就佢...即係要搞清楚，即係原來呢，即係當時呢，佢哋左派好奇怪就係...佢嘅所謂敵人或者對手呢，就係好清楚嘅，一係就工團總會呀，國民黨，一係就美國佬呀，美新處呀，咩嘢特務呀咁樣，一係就英國佬呀，殖民主義呀，佢諗唔到有個左嘅...佢諗唔到有個仲左過佢，即係言必馬克思，吓，

話則列寧，即係咁樣嘅，咁仲...間中仲將...佢哋會將呢，即係哲古華拉就扮成呢個托洛斯基主義出嚟(笑)，即係就好冤枉，你見到一日到晚阿長毛就...哎，佢聽到呢句說話佢而家嬲我嘞，即係一日到晚就着住哲古華拉，就哲古華拉從來就唔係托洛斯基嘅，咁但係佢就認為呢個人呢，個思想就係...就係呢個不斷革命嘅，咁所以就納入埋呢，呢個哲古華拉係一個 symbol，一個 icon 嚟㗎嘛，就將佢變成一個托洛斯基主義者。

39:13 訪談員： 但係老實講吓，我都係睇《十月評論》呢，我有睇過《十月評論》，喺《十月評論》嗰陣時呢，先睇到石中英呢個名，石中英呢個名呢，我就係睇《十月評論》呢，知道嘅。

39:27 受訪者： (笑)係呀，使唔使要多謝佢，我都有鬧佢，佢鬧...即係鬧得我好緊要，咁所以嗰陣時一個人係有少少...我記得呢我喺《文匯報》有啲嘅讀...即係我另一手呢，就寫啲散文啦，咁都有啲係好鍾意睇我啲散文，好似李...Polytech 有個女學生，就識得一個《文匯報》記者，我介紹去《文匯報》做嘅，嗰個女仔好鍾意我寫嘅嘢，買咗二百本嚟送畀啲同學，佢想同你傾偈，我話點見人呀？咁啦，傾電話好，咁於是呢，我就 er...某一個晚上，就走去《文匯報》，咁個女仔就打電話去《文匯報》，就畀個記者，咁我就傾咗成個鐘頭偈，係咁樣樣，即係我要...即係將自己隱...因為如果唔係嗰，你搞啲咁嘅嘢呢，你教書呀梗係畀人炒魷（解僱）嘞(笑)，係咪先？你好多嘢㗎嘛。

40:21 訪談員： 唔係誇張到咁呀？即係你真面目唔可以畀人見到。

40:23 受訪者： 咁你...係保持一定嘅神秘性或者保持一定...即係唔好受干擾囉。

40:29 訪談員： 哦，其實你係咪即係感受到好大嘅壓力呢？

40:33 受訪者： 有壓力，即係變咗政治壓力，所以收棍亦都形成我...掙低枝筆我話唔寫就唔寫嘞，因為我...即係你係客觀上有兩樣嘢呢，你寫散文都好啲，一寫論文呢，客觀

上有兩樣嘢，一係就打手，一係就烈士，即係我自己就覺得，你分分鐘呢人哋...你唔認為...你係打手，人哋都認為你係打手。

40:52 訪談員： 一係就打手，一係就烈士。

40:55 受訪者： 烈士，一係嗰條友...你一有犯政治錯誤你就烈士，所以...點解我 77 年之後呢，我就完全...唔再寫嘢，78 年。

41:03 訪談員： 但係你批托呢，批到咩時候就突然間中止呢？呀，我唔應該咁樣問。

41:08 受訪者： 噏，你應該呢...可以咁問，因為四人幫嘅倒台，(停頓)因為四人...76 年毛澤東逝世之後，到四人幫被捉呢，即係個思想係令人一個咁樣嘅反思呀，個反思就係...我實際上我批托，我係覺得我唔我先做咁嘅嘢，唔瞓覺...有幾錢稿費啫係咪先？吓嘛？又唔瞓覺睇咁多書，又要做呢件嘢，仲要呢，就好似阿魯迅咁呀鼓勵自己，自覺執...自覺呀佢話，自覺執前輩革命者嘅將令，即係自覺咋，有人叫你咁做，人哋嘅將令你就係去打擊一班...呢個塗脂抹粉嘅敵人，其實呢篇呢，就係取材於呢個魯迅嘅篇，好有名嘅，叫〈答托洛斯基派一封信〉，魯迅嘅篇，咁呢就你見到我呢，好魯迅㗎嘛，連個名石都係(笑)，石在火中不會滅㗎度，咁呀佢呢都係咁講，佢呀...即係邊個叫魯迅批托啫，就唔係我批托先㗎，就魯迅都批托，咁你〈答托洛斯基派一封信〉㗎度已經有呢句嘢㗎，咁自覺執...咁我覺得我都應該自覺執呢個將令，即係呢啲係塗脂抹粉，即係...佢有所謂，佢唔好將自己打扮成革命者，即係咁嘅啫，即係其實做一個咁嘅嘢，咁但係呢，咁嘅情況底下你四人幫倒台，毛澤東嘅嘢係點呢？四人幫係點樣樣？個反思就係覺得...即係慢慢好模糊之中覺得呢，可能我係用一種錯誤嘅嘢批判一種錯誤嘅嘢，噏，托洛斯基主義可能係錯，但係你用基...建基於史太林嘅嘢，建基於毛澤東嘅嘢，可能你都係一種錯誤嘅選擇，咁呢個就係導致我講畀你聽呢，喺呢個...我教咗四年書出嚟之後，其實我嗰陣時 on the way 呢，三聯書局係...訂我，要我寫一本托洛斯基主義嘅書嘅，單行本出，

就唔係一篇篇文章，咁呢個問題上呢，係阿羅孚...約阿藍真嘅，羅孚約阿藍真做呢件事嘅，佢兩個老友記。

43:30 訪談員： 所以藍真就邀請你去自己寫一本...

43:33 受訪者： 咁羅孚話...你寫咁多篇咪寫埋佢囉(笑)，寫埋出本專書仲好啦，即係嗰陣時大家都係...鬥呀、鬥呀、鬥呀，咁呀寫咗段，咁衰，人哋叫我唔做嘢，有所謂囉，咁呀暑假咪寫埋佢囉，咁所以真係二十萬字...

43:46 訪談員： 寫咗廿萬字呀？

43:48 受訪者： 廿萬字，好詳細嗰本，即係由托洛斯基、托洛斯基主義、第四國際、到香港托派...唔係，到中國托派、到香港托派，全部有晒。

44:02 訪談員： 咁嗰本書有冇初步嘅書名呀嗰陣時？

44:04 受訪者： 呀，未有呀，但係已經寫好交稿，咁收扃就係阿...蕭滋上台，阿小柔如，對於做呢件事...

44:12 訪談員： 你講商務嘅度。

44:14 受訪者： 即係阿三聯，阿小柔如...

44:16 訪談員： 三聯，對唔住。

44:17 受訪者： 因為嗰陣時佢要唔好再搞呢啲政治書，咁我...亦都寫完之後我覺得...唔係好鍾意，因為我已經開始...四人幫倒台啦嘛我已經話，吓，慢慢反思，約好，大家唔好再...停咗佢。

44:33 訪談員： 即係你同蕭滋嗰度有個約定，即係唔出版。

44:35 受訪者： 係嘞，stop，我擺番本書...我擺番個稿，擺番晒。

44:38 訪談員： 即係佢都畀番個稿你。

44:40 受訪者：排咗嘞，排好版，排好版，其實呀，即係好幸運，排好版，永遠一個好污糟嘅嘢嘅度，即係一個...點樣污糟呢？你係錯誤，如果係錯誤嘅嘢呢，即係你散文就有所謂，你抒情嘅，你呢啲...呢啲理論討論呢，一個錯誤嘅嘢你永遠留嚟度，仲要咁厚啲本書，二十萬字，而我最後真係一把火燒咗佢，咁可能其實我都有少少...有咩後悔，其實唔係，完全冇後悔，但係你既然...我就係諗，如果你都覺得你個...唔夠完美，或者係有錯誤嘅嘢，你點解仲保留嚟度嘅？

45:19 訪談員：哦，即係你攞番你個原稿，但係排版嘅稿有冇攞到呀？有？

45:25 受訪者：佢有印㗎嘞，係呀，我諗佢銷毀，佢拆番，嗰陣時用活板之嘛，活板之嘛，吓嘛，唔係電腦。

45:31 訪談員：哦，咁你原稿攞番嚟你就燒咗佢。

45:37 受訪者：燒咗佢，唔係即刻燒，唔係即刻燒吓吓，都...好猶豫擺咗好幾年，趁一年一次過搬屋，唔好再存在就一把火燒咗佢。

45:44 訪談員：哦，會唔會覺得好可惜呀？

45:48 受訪者：唔...你唔放低你就...一定要放低呢啲嘢，有啲可惜，但係 **at the end** 都有...即係...好似個心血去做一樣嘢，係有人會明白，即係我做嘢係好...有陣時我好硬淨，我係一轉軚我就轉晒嘞。

46:06 訪談員：咁即係到最後呢，到最後，都冇人知道石中英係邊個啦㗎，嚟...即係嚟托洛呢件事上便。

46:13 受訪者：咪就係...er...於是呢件事呢，就大概兩年前呢，即係同阿長毛...失散咗三呀幾年之後，就重聚，即係我同佢食飯，我就問佢...問佢幾個問題嘅，第一...即係太熟嘞，長毛，你到底仲係咪第四國際呀？好尖我個問題，咁呢個衰仔呢，一個咁直嘅人呢，就講啲同阿曾德成人咁問佢係咪共產黨員個答案，答個問題差唔多咁滑

嘅答案畀我聽，佢話乜你唔知咩？阿咩，乜你唔知道我哋參加香港立法會係唔能夠有外國政黨背景嘅咩？咁樣，咁梗係 **understood** 啦，我唔會再問㗎㗎，我話哦，即係佢冇話 **yes or no**，但係佢就已經係咁樣答㗎，咁跟住呢...即係高手過招唔使講好多嘢嘅，大家都明㗎㗎，大家都咁熟，而且我係唔會介意嘅，咁...我問佢呢個嘅時候呢，佢未知石中英是我，佢只係知道喺佢眼中嘅阿咩嘅啫，係一個 **YP (Young Prisoner)**，咁而呢，就係...跟住我就問佢啦㗎，佢嗰陣時好細，十零歲嘅啫，所以佢收扞就搞咗個四五行動，四五行動就係再...即係喺革馬盟入便再另外一啲人㗎㗎已經係，吓，即係同呢個咁樣八十年代...即係嗰啲四五行動嗰啲，係另外一個故仔，咁...唔係八十年代，係嗰啲咩周恩來呀咩嗰啲青年嗰啲，嗰啲另一個故仔，咁嘅情況之下呢，就我就問一個問題，喂，記唔記得七十年代呢，我同你喺太陽下便討論托洛斯基主義嗰啲嘢呀？記得，咁我話，你記唔記得喺報刊嗰度裏便呢，批托批得最犀利係邊個先？因為我準備將我呢個故仔講番畀佢聽，咁佢話...佢第一個話，李怡？佢話李怡，其實李怡呢係後期好多嘅，七十年代發表嗰啲嘢，咁跟住我就問佢，長毛，除咗李怡之外，仲有邊個呀？佢即刻唔夠一秒鐘，石中英？咁我就問佢，咁你知唔知石中英係邊個吖？咁我到現在仲記得佢個樣好詫異咁望住我，好奇怪，唔通就係你？(笑)我話冇錯㗎，知唔係我囉，所以就...知唔係我，其實我哋兩兄弟玩晒㗎，佢就係托，我就批托，但係當時我係唔能夠講畀佢聽，咁收扞呢再過...佢呢件事...過咗咁多年應該解密㗎，亦都有咗嗰班《十月評論》，冇咗啲咩嘢，即係冇...亦都長毛唔會將我爆晒出嚟呢個事，即係大家...老實講，政治嘅歧見係好多餘，兄弟情深，大家睇住大家大，吓，我十幾歲識佢，我識佢十二、三歲，有啲咩啫，係咪先，冇嘢㗎，即係唔好畀政治搞到我哋咁樣樣，咁收扞呢好似上...今年年初見佢，突然間爆一句，其實你嗰陣時批托你好勇敢㗎(笑)，咁你就明白我頭先講點解要唔出聲㗎，佢都話我好勇敢。咁仲有一件事呢，石中英個名係點走出嚟呢，就係...大概 74 年度啦，《文匯報》，張文峰，就加入胡隸周治喪委員會委員，張文峰，當時佢已經唔止...好似唔知編訪主任定係升

咗做咩嘢嘞，佢喺《文匯報》大陸，搞個托洛斯基主義思潮討論會，即係當時已經成為一種思潮，即係我批咗先吓嘛，咁就嗰度又鬧吓嘛，吓，好嘞，開始喺大專界，一般...老百姓係唔理呢啲嘢嘅，咁呀大專界開始注意呢件事，咁張文峰係一個好醒目嘅人，一...老實講張文峰係所謂左派報館改革嘅一個好重要人物，因為佢請好多大專學生，不論程翔呀、麥華章呀，你見佢點樣將《文匯報》變成一個咁樣嘅，就會知道佢喺歷史嘅功績幾大，佢喺左派報館裏便，咁佢搞個...搞咗個托洛斯基主義思潮會，咁呀 call 我㗎，佢話你係專家，我呀心諗(笑)，點解無端端變成專家呀？佢話你一定要㗎，但係我話大佬，我唔出到名㗎，我教緊書，我又唔想知，咁用石中英囉，嗱，咁我就於是呢，我就應承佢，我唔係主持，係佢係主持，我係特別嘉賓，即係或者叫嘉賓主持，吓，咁呀坐喺佢側邊嘅，咁嗰次呢就係一個...佢請晒啲港大呀、唔知中大呀，我都唔記得咗咩人，係唯一記得最清楚嘅一個人呢，就叫麥炳良，麥炳良，係中...港大國是學會會長，港大學生會副會長，現在佢個名就叫麥華章，就係《經濟日報》嘅社長，咁佢當時呢就已經係應該大學二年班升最後一年，三年班，港大，Hong Kong U，嗰次我就第一次見佢，同佢傾偈，因為當時...佢識我呢，佢唔係識我嘅...任何嘅身分，佢識我就係石中英嘅身分，就係佢，咁就其他人我唔記得咗係邊個嘞，就...嗰次程翔有冇參加我唔記得咗，咁佢係跟住呢，就你知個情況大家都知啦，麥華章畢咗業之後呢，就入咗《文匯報》，咁《文匯報》呢，就跟住呢，就當時《青年樂園》週刊被封，咁佢係呢，當時有份刊物就叫做...《青年樂園》週刊有份刊物叫做《學生叢書》，出到唔知大概 72、73 結束，當時個編輯...其中一個編輯叫曾芷美，即係曾勵予，就去咗《文匯報》做，咁我就成日去搵佢嘅，咁我就睇住佢兩個...認識、拍拖、結婚、生細路仔、離婚，等等，吓，咁就個故仔就係咁樣，咁所以我即係...都好開心喺《文匯報》嗰度呢都係...一個身分㗎講，即係我...我唔會後悔我做嘅事，我覺得當時...就算我偏頗，但係我當時都係...就算你偏頗但係至低限度係...引起社會上，或者學術界裏便一個嘅注意力，即係將呢個嘢呢，到底托洛斯基主義係乜嘢

先？你托洛斯基派別係咩嘢先？咁你至少喺社會上便...即係有個認識吓嘛，係咪？同埋同傳統毛派，所謂托，呢啲有咩分別呢？雖然各講各話，但係始終都係有個咁嘅嘢喺度，咁...

53:58 訪談員： 但係嗰次即係喺《文匯報》大廈嗰個討論會啦，吓，就第一次，或者係唯一一次，用石中英嘅身分出現嘅。

54:06 受訪者： 係嘞，係嘞。

54:08 訪談員： 唯一一次，以後就有嘞。

54:11 受訪者： 以後呢，er...即係喺學術界入便有，有啲人呀，好似你學友社要攞我嘅散文去...新光戲院朗誦，叫我寫個劇本喺嗰度演出，咁我都用石中英身分去幫佢手編排個朗誦，同埋用呢個身分接受阿古兆奉嘅訪問，不過嗰次見到小思話你哋搞到...古兆奉喺《盤古》嘅時候呢，76年走嚟訪問我，就掛住寫一個...即係古兆奉喺寫《上海灘》之前佢嚟走嚟訪問我寫個劇本㗎(笑)，就咁樣樣。

54:50 訪談員： 但係如果係話一個公開嘅場合呢，就一次，就係 er...

54:55 受訪者： 係嘞，但係現在我準備用我呢個身分嚟做我 YP(Young Prisoner) 嘅身分(笑)。

55:00 訪談員： 暫時啦，就即係喺《文匯報》嗰度呢，就第一次，即係第一次公開嘅。

55:06 受訪者： 係呀，係呀，嗰次都成二...十幾廿人㗎，冚嗰啲(全部)都大學生㗎，吓。

55:11 訪談員： 噏，到你頭先講啦，去到 77 年即係四人幫倒台，思想上有啲...即係沖激，所以你就...覺得可能用一種錯誤嘅嘢，去批評一個錯誤嘅嘢。

55:24 受訪者： 係。

55:25 訪談員： 咁譬如呢一個咁嘅經歷呢，對你嚟講係除咗...批托終

止嘞，即係唔再批嘞，咁帶嚟咗嘅除咗呢樣嘢之外仲有冇其他變化？

55:34 受訪者： er...我其實從 78 年開始呢，基本上我所有嘢都唔寫嘞。

55:43 訪談員： 放低枝筆，乜都唔寫嘞。

55:45 受訪者： 全部唔寫，我連散文都唔寫，我散文唔寫，我覺得我應該係用我個生命去寫另一種嘢，咁...當時當然係啦，我係比較忙碌啦，我教咗第二間學校，萃華。

56:00 訪談員： 你搵咗另一間學校。

56:02 受訪者： 係嘞，即係我(笑)嗰個嘢...嗰本嘢寫完之後呢，排咗版，咁跟住大家議決唔好出嘞，咁我就大概 10 月份，9 月底，即係...唔知 77 定 78 年嘅，應該 77 呀，八、九、十、十一，係嘞，77 年嘅 9 月、10 月度，我重新再搵一份教書。

56:27 訪談員： 自己搵啦啲今次。

56:29 受訪者： 係呀，咁...完全...係毫無難度啲，我揸個黃頁㗎咋啲，揸個黃頁呢，第一間學校叫文法書院，咁於是呢就文法書院打第一個電話，咁有個女士聽電話，咁我話文法書院係咪呀？你請唔請一個數學教師，Form Five 嘅，我喺...點點點點點，咁個女士聽，佢話請，但係你睇清楚吓，我哋唔係文法書院，我哋改咗名叫萃華書院啲，我話呀，對唔住，我唔知啲，我睇黃頁嘅，咁佢話...咁你呀請，咁幾時去搵邊個見工呢？佢話聽日啦，聽日你去砵蘭街萃華學校見工，我話見邊個呀？咪見我囉，你係邊個呀？我就係呢間學校嘅校監囉，收畀我至知原來嗰日佢唔知點解無噏噏拎起個電話嚟聽嘅啫，即係我以為係 operator，原來係一個校監，咁於是就見咗工，咁都係差唔多都係十分鐘就...聽日上堂啦。

57:28 訪談員： 萃華個萃係邊個萃呀？

57:30 受訪者： 草花頭個，Oberlin，嘅（是），一個好好嘅學校，有八千人個學校，八千人，五個地...五個學校，即係呢個係...

57:41 訪談員： 五個校舍。

57:42 受訪者： 嘅，五個校舍，即係香港私校裏便呢，係一個高峰期，即係香港呢，係當時人口爆炸，政府係有咁多資源係買私校位呀，畀錢啲私校畀啲位啲學生讀，所以...

57:55 訪談員： 咁你喺邊個校舍返工呀？

57:58 受訪者： 我喺...喺呢個油麻地做一年，跟住就突然間話喂，不如你去 er...筲箕灣東大街啦，個個都話喂，環頭環尾好濕滯㗎(笑)，有漁民㗎，你去東大街，去啦！於是喺嗰度做咗三年，做到 81 年為止，即係我喺萃華喺...教咗四年，教過學校呢都係...我又教 Form Five Maths 嘞，Form Five、Form Four，吓，但係主要都係 Form Five，咁就係...教咗邊啲學校呢？就係...油麻地啦，教咗筲箕灣啦，咁跟住就係土瓜灣話喂，我夜校，你要教埋，咁夜晚我又教啦，咁突然間佢話喂，我現在銅鑼灣，即係天后站嗰度上蓋嗰度 er...即係唔知現在做咗金殿大廈嗰度呢，搞緊女校㗎，我話叫我教女校呀？佢話唔係呀，開個 GC 班，即係考輪大嘅，咁你教輪大嘅 GC 班嘅 Maths 啦，咁於是我四間學校都教晒嘞，咁而且我夜晚呢，就開始覺得我唔夠料，我就...77 年就報讀咗樹仁，夜校，咁所以我都係好...都好感激樹仁有夜大專開，雖然嗰陣時係私立，即係我嘅情況我都難入其他學校㗎嘞諗住呀，即係我唔知收咗嗰啲皇仁仔啦，坐完監都可以入到大學(笑)，我唔知㗎，即係我以為唔得㗎嘞已經係，咁所以我一路做嘢呢，咁...個夜晚就讀，咁我今次就搵中文歷史，我讀文史，但係我有讀到畢業，我讀三年。

59:50 訪談員： 讀咗三年。

59:52 受訪者： 讀咗三年，咁跟住已經 occupy 我所有時間，即係日頭教...上晝班、下晝班、夜校，夜晚呢就要返樹仁嘅夜

大專，咁呀朝頭早八點...即係七點半出門口，一路到夜晚九點半先至 er...放咗樹仁萬望臺放咗咪嚟下便食...食飯夜晚，係咁㗎嘞，好劬，好辛苦，咁但係都叫做學到下嘢，咁...寫作，冇咩時間，我另外仲係...仲係個團體度幫緊手係義務...

60:31 訪談員： 都係雅健個度。

60:33 受訪者： 係呀，義務都係教補習，教書，組織一啲班組呀，學術，研究啲啲 er...都有乜嘢研究，總之係...即係好似中國地震，咁有個地震展覽咁，小兒科嘅事，即係 in and between 呢有啲嘢會做下，好似突然間 er...專上學生或者中學生組咁樣，就會叫你，哦，你可唔可以同我講講魯迅呀，咁係 Polytech，咁呀又走去講咗三個鐘頭，咁呀係，嗰個階段上呢，除咗做啲咁嘅嘢之外呢，其實我係另一個嘢就係做...即係...搞一啲，負責做一個義工呀，安排一啲大學生同埋中學生返大陸，去玩嘅，旅遊，去參觀呀，吓。

61:21 訪談員： 就係雅健個度嘅？

61:23 受訪者： 唔係雅健呀，完全唔係㗎嘞，啲啲係同啲工會呀，一齊嚟度呢，即係...即係當時我一個咁樣嘅 job，又唔係又受薪嘅，一種義工嘅狀態啦，會做一啲安排啲人上去。

61:40 訪談員： 主要幫邊個工會做呀呢啲？

61:42 受訪者： 唔係工會呀，即係佢哋工會就會將中旅社一啲團分咗佢，咁學生係有啲...培僑嘅有啲，咁有啲呢，就呢啲咁樣嘅，學生界呀，吓，即係有啲，譬如 Hong Kong U，或者咩嘢，即係咁其實呢，都係...即係我變咗個義工做一啲又唔係真...因為呢個事實我後期去做旅遊嘅一個前景，即係所以我...比較中國旅遊我好前期已經介入咗，我七十年代，七十年代已經開始介入咗啦，譬如佢哋去七星岩玩呀，要收錢㗎嘞，唔係免費㗎嘞，吓，咁就要 er...但係佢哋有啲係好難去到㗎嘞，好似一啲學校嘅學生啲啲，咁呀其實工會負責嘅。

62:30 訪談員： 工會負責，但係你係因為識得工會啲人，咁佢哋就叫你幫下手。

62:36 受訪者： 係嘞，咁工會...工聯會嘅，工聯會呢，咁工聯會有個叫阿謙叔，劉謙，係負責呢件事，咁跟住呢就有啲...培僑有一個學生，咁跟住呢就唔知 er...花卉工會阿梁林就負責鄉下佬嘅，吓，即係有啲咁嘅嘢。

62:55 訪談員： 咁樣你就係幫手負責啲學生嘅。

62:58 受訪者： 我負責就唔係全部，就有啲叫做非左派學校學生，咁就其實...我做嘅嘢好簡單之嘛，佢哦，佢有十團畀我，咁然後佢哋點樣邊啲去...參加，係佢哋學校嘅事，唔關我事，我都唔識啲啲人，咁呀總言之係咁樣。

63:16 訪談員： 但係你個角色係咩呢？你係...

63:19 受訪者： 我個角色係一個 coordinator 咁樣囉。

63:21 訪談員： Coordinator，就話畀啲學校聽有啲咁嘅機會，咁學校自己去安排嘞。

63:26 受訪者： 係嘞，係嘞，啲學生，譬如學聯中學生組，有幾...有一、兩批呀，學聯會呀，或者港大國是學會呀，即係呢類嘢。

63:33 訪談員： 即係交界學生會自己去搞□嘞，即係學生組織啦。

63:36 受訪者： 係嘞，係嘞，係嘞，咁肯定呢，就係呢啲係屬於大陸一個叫做港澳同胞接待辦公室，即係佢唔係港澳辦吓，即係係廣東省嘅港澳同胞接待辦公室，係嘞，佢嘅前身就係所謂支港鬥爭委員會，即係嗰度一路演化嚟，咁呀收畀就淡化，而家有嚟嘞，即係嗰啲係...叫做...即係畀啲機會啲啲工農兵學商咁樣，返下大陸咁樣，咁呢個後期就引伸就變成我參加個華南旅行社就好自然，就當時除咗啲人上去...玩之外就係有啲咁工會呀，即係...即係譬如工餘工會呀，或者咁官立...即係

嗰啲會大家包個團去咁樣，即係嗰陣時未 ... 未
completely 開放㗎旅遊。

（本段結束）